



ADMINISTRACIÓN LOCAL

PROVINCIAL

DEPUTACIÓN PROVINCIAL DA CORUÑA

Servizo de Acción Social, Cultural e Deportes. Sección de Servizos Sociais

Aprobación das bases do IV Premio de “Boas Prácticas en Servizos Sociais” da Deputación Provincial da Coruña, ano 2024

BASES

1.- Obxecto

O Premio de “Boas Prácticas en Servizos Sociais” da Deputación da Coruña, busca recoñecer e premiar o traballo realizado por entidades sen ánimo de lucro do ámbito dos servizos sociais que desenvolvan a súa actividade na provincia da Coruña e que, a xuízo desta administración, destaquen polo seu labor en defensa dos dereitos da cidadanía e a favor dos grupos máis vulnerables, promovendo un maior benestar social das persoas, grupos e comunidades.

O presente premio está incluído no plan estratéxico provincial de subvencións da Deputación 2024 e contribúe ao logro dos obxectivos incorporados no dito plan.

1.1 Requisitos dos proxectos

- Os proxectos presentados deben ser orixinais.
- Os proxectos sociais e de investigación, que deberán desenvolverse no ámbito territorial da provincia da Coruña, poderán estar finalizados ou en vías de execución dentro do prazo de resolución da convocatoria.
- Os proxectos empregarán a lingua galega e unha linguaxe con perspectiva de xénero.

1.2 Exclusiones

- Exclúense desta convocatoria todos aqueles proxectos que teñan por finalidade a atención sanitaria e a cooperación internacional por non ser estes competencia en materia de servizos sociais.
- Exclúense os proxectos en materia de igualdade de xénero, deporte adaptado, actividades culturais, voluntariado e tempo de lecer.
- Non poden participar os proxectos xa premiados en edicións anteriores do premio ou en calquera convocatoria de similar natureza.

2. Requisitos das entidades candidatas

- As entidades participantes deben estar rexistradas como entidades de iniciativa social sen ánimo de lucro no Rexistro único de entidades prestadoras de servizos sociais da Xunta de Galicia (cuxa comprobación farase de oficio pola Administración convocante)
- Atoparse ao corrente nas súas obrigas tributarias e coa Seguridade Social.
- Non estar incursoas en causas de prohibición, incapacidade ou incompatibilidade establecidas nos artigos 13.2 e 13.3 da Lei 38/2003, do 17 de novembro, xeral de subvencións.
- Dado que a tramitación será telemática, quen presente a candidatura deberá:
 - Dispoñer dun único enderezo electrónico de contacto durante a tramitación do expediente, ao que se dirixirán as comunicacións. Excepcionalmente, e de xeito xustificado, poderá modificar este enderezo inicial, sempre e cando se lle notifique a circunstancia pertinente á Deputación.
 - Dispoñer de certificado dixital.

3.- Premios

Establécense 6 premios, dotados con 7.000 € cada un, nas seguintes dúas modalidades:

3.1 Modalidade de proxectos

Na modalidade de proxectos poderán concederse 5 premios, 1 por cada unha das seguintes categorías:

- a) Investigación científica no ámbito dos Servizos Sociais

- b) Iniciativas no ámbito rural
- c) Área de persoas maiores, discapacidade e dependencia
- d) Área de familia, infancia e adolescencia
- e) Área de inclusión social

No caso de quedar deserta algunha categoría, o xurado poderá propoñer premiar máis dun proxecto nas outras categorías, sen que en ningún caso se premien a máis de 5 candidaturas nesta modalidade.

3.2 Modalidade de traxectoria da entidade

Na modalidade de traxectoria da entidade poderá concederse 1 premio.

Os premios están suxeitos ás retencións legais que lle foren aplicables.

A Deputación resérvase o dereito de modificar as condicións do premio en calquera momento, incluso pode chegar a anulalo ou deixalo sen efecto sempre que concorra causa xustificada, en todo caso comprométese a comunicalo pola mesma vía.

A entrega dos premios organizaraa a Deputación Provincial da Coruña e consistirá nun acto público no que se convidará a todas as entidades participantes e onde se fará entrega das distincións ás entidades premiadas.

4.- Prazo e forma de presentación das candidaturas

4.1 Prazo

O prazo de presentación de solicitudes determinarase no anuncio de publicación da convocatoria deste programa no BOP da Coruña a través da Base de Datos Nacional de Subvencións.

4.2 Forma de presentación das candidaturas

As candidaturas presentadas deberán estar ben identificadas, indicando con claridade o nome da entidade e do proxecto. Non se valorará a actividade xeral da entidade, agás no caso do premio á traxectoria da entidade.

As entidades deberán presentar unha única candidatura, debendo optar entre a modalidade de proxectos ou a de traxectoria da entidade. Se optara pola modalidade de proxectos, este deberá encadrarse soamente nunha das categorías definidas no punto 3.1.

No caso de presentación de varias candidaturas pola mesma entidade só se terá en conta a última presentada, que deixará sen efecto e anulará todas as anteriores.

As candidaturas deberán presentarse a través do apartado correspondente á convocatoria da plataforma telemática Subtel (na páxina web <https://sede.dacoruna.gal/Subtel/>) presentando toda a información requirida.

Non se terán por presentadas as candidaturas que se acheguen noutros rexistros.

A presentación da candidatura e toda a súa documentación deberá ser asinada dixitalmente pola persoa que a presenta.

A presentación telemática producirá plenos efectos xurídicos, sempre que a solicitude sexa presentada dentro do prazo establecido e na plataforma citada.

Serán rexeitadas automaticamente as solicitudes que conteñan documentos electrónicos que incorporen código malicioso ou dispositivo susceptible de afectar a integridade ou seguridade do sistema, omitan documentos esixidos, non cubran nos cuestionarios telemáticos os campos requiridos como obrigatorios ou cando conteñan incongruencias ou omisións que impidan o seu tratamento.

5.- Documentación da presentación das candidaturas

Aquelas entidades interesadas deberán presentar, dentro do prazo establecido, a documentación seguinte:

Documentación xeral:

- a) Aceptación das condicións da convocatoria.
- b) Nomeamento da persoa representante para a súas relacións coa Deputación da Coruña.
- c) Declaración conforme o proxecto é orixinal e o proxecto presentado non está premiado en edicións anteriores do premio ou en calquera convocatoria de similar natureza.
- d) Autorización para publicar a información do proxecto na páxina web, na Galería de experiencias de benestar co obxecto de dar a coñecer o labor en defensa da cidadanía e a favor dos grupos máis vulnerables.
- e) Certificación da AEAT conforme están exentos ou no de tributar no Imposto de Sociedades.

- f) Declaración de non estar incurso en causas de prohibición, incapacidade ou incompatibilidade establecidas nos artigos 13.2 e 13.3 da Lei 38/2003, do 17 de novembro, xeral de subvencións.
- g) Certificacións das administracións tributarias correspondentes e da Tesourería da Seguridade Social nas que se acredite que a entidade está ao corrente nas súas obrigas tributarias e coa Seguridade Social. Poderá omitirse a presentación desta documentación sempre que autorice expresamente na Plataforma SUBTEL a consultas tributarias e non se opoña á consulta de datos da Seguridade Social.

Documentación específica para as candidaturas:

- d) Memoria técnica para a candidatura de ambas modalidades, segundo o modelo fornecido pola Deputación, que se atopará na plataforma SUBTEL. Presentarase en formato A-4, espazo interlineal sinxelo, na letra Arial 10, cunha extensión máxima de 10 páxinas e en soporte informático. No caso de que se excedan as 10 páxinas, as adicionais non se terán en conta para a valoración. As fotografías e gráficos que poden engadirse, de ser o caso, terán un formato JPG, 150 ppp. Poderán incluírse ligazóns a documentos e/ou recursos propios do programa.

6.- Procedemento de concesión

Logo de recibidas as candidaturas, a unidade xestora determinará as que reúnen todos os requisitos e o someterá a valoración de acordo coa base 8.

O xurado propondrá de forma motivada as candidaturas que resultan premiadas e poderá declarar deserto/s o/s premio/s.

Logo da preceptiva fiscalización do órgano interventor, a Presidencia ditará resolución de concesión do premio ou, no seu caso, resolución declarándoo deserto.

A decisión do xurado será inapelable e será dada a coñecer na páxina web da Deputación.

7.- Composición do xurado

O xurado estará presidido pola deputada de Política Social, Educación e Mocidade. Formará parte del o persoal técnico da Sección de Servizos Sociais e, de ser o caso, profesionais de recoñecido prestixio no ámbito dos servizos sociais

As funcións de secretaría exerceraas a secretaria da Corporación, ou a funcionaria ou funcionario en quen delegue.

As persoas que integren o xurado estarán sometidas ao deber de abstención nos casos sinalados no artigo 23 da Lei 40/2015, do 1 de outubro, de réxime xurídico do sector público.

A composición do xurado darase a coñecer, con anterioridade á súa reunión, no taboleiro de anuncios da sede electrónica da Deputación (<https://sede.dacoruna.gal/sxc/gl/informacion/>), co fin de que se poida promover, se é o caso, a recusación dos seus membros.

8.- Actuacións do xurado

O xurado actuará en pleno, en sesión a ser posible única, e será necesaria a asistencia da maioría simple dos seus membros. Para os efectos da validez da súa constitución aplicarase o disposto no artigo 17 da Lei 40/2015, do 1 de outubro, de réxime xurídico do sector público.

As deliberacións serán secretas e delas redactarase a acta correspondente.

O xurado poderá solicitarlles ás entidades participantes, as aclaracións que considere necesarias para a avaliación das candidaturas.

O xurado presentará a súa proposta á Presidencia da Deputación, que é o órgano competente para conceder o premio.

9.- Valoración das candidaturas

Para os efectos desta convocatoria enténdese como “Boas prácticas”, aquelas consistentes nun “conxunto de actuacións, experiencias, programas ou proxectos executados, a través dos cales mellora a calidade dos servizos prestados e /ou a resolución dun problema ou necesidade detectada”

A valoración das candidaturas constará de dúas fases:

Primeira fase: O persoal técnico da Sección de Servizos Sociais seleccionará as candidaturas por modalidade e categoría conforme ós criterios de valoración definidos.

Non se valorarán as candidaturas que non acheguen a memoria cuberta en todos os seus apartados.

Será necesario que as candidaturas acaden unha puntuación mínima de 50 puntos para optar a un premio e pasar á segunda fase.

Segunda fase: As candidaturas seleccionadas pasarán á consideración do xurado, que fará a proposta de adxudicación dos premios.

Tanto na modalidade de proxecto como na modalidade de traxectoria da entidade valorarase de forma común a claridade, a precisión, a coherencia e a concisión do contido exposto en relación á información que se solicita.

O xurado poderá engadir motivadamente outros criterios aos especificados nesta base.

9.1. Criterios de valoración na modalidade de proxecto

Atendendo á Lei 13/2008, do 3 de decembro, de Servizos Sociais de Galicia, os proxectos de investigación no ámbito dos Servizos Sociais serán aqueles que promovan o estudo e o coñecemento sobre as necesidades emerxentes de atención social, sobre os factores que inciden na demanda e sobre a avaliación dos elementos organizativos e de xestión do sistema.

Asúmese a definición de proxecto social de Ander Egg y Aguilar (2005) como o conxunto de accións desenvolvidas nun tempo e espazo determinado, e emprendidas en modo articulado combinando a utilización de diferentes recursos (humanos, técnicos, materiais) en función do logro de determinado obxectivo previamente estipulado, o cal se xustifica pola existencia dunha determinada situación-problema que se quere transformar.

Segundo estas definicións terase en conta en cada categoría o seguinte:

- a) Investigación científica no ámbito dos servizos sociais: valorarase a calidade científica do proxecto de investigación realizado no ámbito dos servizos sociais, o impacto do traballo no ámbito social; a capacidade de transferencia da investigación á sociedade, á comunidade ou a un colectivo vulnerable; se o traballo está publicado en revistas científicas nacionais ou internacionais recoñecidas e valoraranse aqueles aspectos que desenvolvesen, mellorado ou implantado no ámbito social ou comunitario.
- b) Iniciativas no ámbito rural: valorarase a calidade técnica daqueles proxectos sociais que se leven a cabo en concellos de menos de 20.000 habitantes e/ou que promovan o desenvolvemento social do mesmo.
- c) Área de persoas maiores, discapacidade e dependencia: valorarase a calidade técnica de proxectos sociais dirixidos ás persoas maiores, persoas con discapacidade e/ou persoas con dependencia, así como o seu impacto na mellora da calidade e condicións de vida do grupo destinatario.
- d) Área de familia, infancia e adolescencia: valorarase a calidade técnica de proxectos sociais dirixidos á familia, infancia e/ou á adolescencia, así como o seu impacto na mellora da calidade e condicións de vida do grupo destinatario.
- e) Área de inclusión social: valorarase a calidade técnica de proxectos sociais dirixidos a persoas en risco ou en situación de exclusión social, así como o seu impacto na mellora da calidade e condicións de vida do grupo destinatario.

O contido da memoria técnica para a candidatura de proxectos será valorado segundo os seguintes criterios:

| Contido da memoria técnica | Ata 100 puntos |
|---|----------------|
| Descrición do proxecto: Valorarase a capacidade de resumir a realidade que se quere cambiar, a finalidade do proxecto, as características xerais da intervención, o grupo destinatario e o resultado que se espera obter ou que se obtivo co proxecto social ou co proxecto de investigación. | Ata 5 puntos |
| Diagnóstico previo: Valorarase a detección, análise e priorización das necesidades sociais que se pretenden resolver co proxecto, así mesmo, terase en conta o nivel de participación das persoas destinatarias. Debe quedar clara a realidade que se quere cambiar co proxecto e como foi o proceso para determinala. Nos proxectos de investigación científica ademais da descrición da situación-problema, débese contemplar a formulación de hipóteses e variables | Ata 10 puntos |
| Persoas destinatarias do proxecto: Valorarase a descrición do grupo destinatario en aspectos tales como: distinción entre persoas beneficiadas de forma directa e indirecta, características xerais e concretas do grupo, número de persoas destinatarias. Nos proxectos de investigación científica é a descrición da poboación e da mostra. | Ata 5 puntos |
| Obxectivo xeral e obxectivos específicos: Valorarase a relación do obxectivo xeral coas necesidades detectadas, a vinculación dos obxectivos específicos co obxectivo xeral. Os obxectivos deben describir os resultados concretos que se pretenden conseguir, deber ser realistas e estar ordenados segundo a súa importancia (de maior a menor) | Ata 10 puntos |
| Metodoloxía: Valorarase o modo, os procedementos e as técnicas empregadas para desenvolver o proxecto. Terase en conta se a metodoloxía conta con perspectiva crítica, participativa e socioeducativa; así como se existen medidas de responsabilidade social, tales como medidas en materia de igualdade de xénero, accesibilidade, sustentable e medioambiental. | Ata 10 puntos |
| Actividades: Valoraranse as accións levadas a cabo cunha relación directa e lóxica cos obxectivos formulados. Deber ser suficientes para conseguilos. | Ata 10 puntos |

| | |
|---|----------------|
| <p>Recursos humanos, materiais e económicos: Valorarase se os recursos descritos son realistas e suficientes para o desenvolvemento do proxecto. Nos recursos humanos (técnicos e voluntarios) é importante a especialización e a formación concorde ao proxecto. Nos recursos económicos é importante a diversidade nas fontes de financiamento e se é sustentable. Nos proxectos sociais terase en conta a innovación social e o uso de novas tecnoloxías.</p> | Ata 10 puntos |
| <p>Proceso avaliativo: Valorarase se é unha avaliación fiable, obxectiva e crible (existencia de indicadores avaliativos e uso de ferramentas, técnicas e instrumentos de avaliación). Debe ser unha avaliación continua, participativa e permitir o deseño de accións futuras. Valorarse a eficacia do proxecto: estudo da situación final fronte á situación de partida (grao de consecución dos obxectivos formulados no momento da presentación da candidatura, os resultados obtidos, ó número de persoas beneficiadas, etcétera). Valorarase a eficiencia do proxecto: estudo da relación entre os resultados obtidos e os recursos empregados. Nos proxectos de investigación científica valorarase a análise e interpretación de datos, así como as conclusións e recomendacións.</p> | Ata 10 puntos |
| <p>Calendario de realización: Valorarase a programación das actividades e a relación de sucesión ou simultaneidade entre elas. Terase en conta se houbo unha previsión no calendario de accións avaliativas ao longo e ao final do proxecto.</p> | Ata 2,5 puntos |
| <p>Xestión do proxecto: Valorarase a organización, a coordinación interna e externa para a execución do proxecto, os métodos utilizados para a promoción, a difusión do proxecto e o nivel de participación das persoas destinatarias do proxecto. Nos proxectos de investigación científica valorarase a xestión do proxecto ata 2 puntos e ata 0,5 puntos se o traballo está publicado en revistas científicas nacionais ou internacionais recoñecidas.</p> | Ata 2,5 puntos |
| <p>Resultado segundo a finalidade da convocatoria Nos proxectos de investigación científica valorarase o impacto do traballo no ámbito dos servizos sociais e a capacidade de transferencia da investigación á comunidade. Teranse en conta os aspectos que desenvolvesen, mellorado ou implantado no ámbito social ou comunitario. En todos os proxectos sociais valorarase a capacidade de transmisibilidade a outras organizacións e/ou territorios. Nos proxectos sociais de iniciativas no ámbito rural valorarase en que medida o proxecto promove o desenvolvemento social dun concello de menos de 20.000 habitantes. No resto dos proxectos sociais valorarase a mellora da calidade de vida, as condicións sociais, o entorno social e as relacións humanas das persoas destinatarias do proxecto social dunha área de actuación dos servizos sociais.</p> | Ata 10 puntos |
| <p>Vídeo de candidatura: (formato horizontal, duración máxima de 3 minutos e resolución mínima de 1.080 píxeles) Valorarase a claridade do vídeo, en formato audiovisual, no que se presente o proxecto social ou científico, os motivos polos que a candidatura merece ser gañadora e demais aspectos destacables que se consideren oportunos. Terase en conta a creatividade do vídeo, o seu guión e a súa estrutura.</p> | Ata 15 puntos |
| Enlace: | |

9.2. Criterios de valoración na modalidade de traxectoria da entidade

Valorarase o traballo realizado por unha entidade sen ánimo de lucro en favor dos dereitos sociais das persoas, o seu desenvolvemento e campo de acción, a súa experiencia, recursos e especialización.

O contido da memoria técnica para a candidatura de traxectoria da entidade será valorado segundo os seguintes criterios:

| Contido da memoria técnica | Ata 100 puntos |
|---|----------------|
| <p>Antecedentes da entidade: Valorarase o traballo realizado pola entidade sen ánimo de lucro en favor dos dereitos sociais das persoas, o seu desenvolvemento e o campo de acción, tales como proxectos relevantes e boas prácticas.</p> | Ata 30 puntos |
| <p>Traxectoria da entidade: Valorarase a experiencia, a especialización e os recursos utilizados, así como a diferenciación e o posicionamento da entidade social respecto ao resto de entidades.</p> | Ata 30 puntos |
| <p>Impacto social: Valorarase a contribución da entidade á mellora da calidade de vida das persoas destinatarias do seu servizo e aqueles aspectos que desenvolvesen, mellorado ou implantado no ámbito social ou comunitario de actuación.</p> | Ata 30 puntos |
| <p>Vídeo de candidatura: (formato horizontal, duración máxima de 3 minutos e resolución mínima de 1.080 píxeles) Valorarase a claridade do vídeo, en formato audiovisual, no que se presente a entidade, a descrición clara dos servizos sociais que presta, motivos polos que a candidatura merece ser gañadora e demais aspectos destacables da candidatura. Terase en conta a creatividade do vídeo, guión e a súa estrutura.</p> | Ata 10 puntos |
| Enlace: | |

10.- Pago do premio

O pago dos premios realizarase nun único prazo despois da resolución de concesión, debendo efectuarse, no seu caso, a retención do imposto de sociedades.

11.- Obrigas

As persoas premiadas están obrigadas a divulgar a obtención do premio en calquera soporte ou medio de comunicación.

12.- Protección de datos

Os datos facilitados serán tratados pola Deputación da Coruña coa finalidade de tramitar esta convocatoria.

A participación nesta convocatoria implica aceptar a realización de fotografías e/ou vídeos pola Deputación da Coruña no certame de entrega dos premios, que poderán ser publicadas en:

- A páxina web e perfís en redes sociais da Deputación.
- Filmacións destinadas á promoción da actividade.
- Publicacións para dar a coñecer a actividade.

A lexitimación para o tratamento dos datos persoais baséase no cumprimento dunha misión de interese público.

Os datos poderán ser comunicados ás Administracións públicas para o exercicio das súas competencias e serán conservados de acordo co establecido na normativa de arquivo.

As persoas interesadas poden exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común. Así mesmo se considera que o tratamento incumpre co establecido no RXPDP pode reclamar perante a AEPD.

Poden consultar máis información relacionada coa protección de datos na nosa [Política de Privacidade](#) ou dirixindo un correo a delegadodeprotecciondedatos@dacoruna.gal.

13.- Aceptación das bases

A participación nesta convocatoria supón a total aceptación destas bases.

A Coruña, 8 de novembro de 2024

O presidente,

Valentín González Formoso

A secretaria,

Amparo Taboada Gil

2024/7951